

08 DEC 2001

Minardi-KL

PASUKAN MINARDI TUKAR NAMA UNTUK PROMOSI KL SEBAGAI BANDARAYA DUNIA

PUTRAJAYA, Dec 8 (Bernama) -- Pasukan Formula One yang beroperasi di Itali, Minardi telah menukar namanya kepada "KL Minardi Asiatech" untuk musim 2002 bagi memperkukuhkan hubungannya dengan Malaysia dalam mempromosikan Kuala Lumpur sebagai bandaraya dunia.

Pemilik pasukan, Paul Stoddart berkata imej baru pasukan akan dilancarkan di Kuala Lumpur bulan depan diikuti dengan memperkenalkan kereta baru F1 yang akan digunakan untuk musim baru Februari depan.

Stoddart bersama Menteri Belia dan Sukan Datuk Hishammuddin Hussein telah mengadakan pertemuan selama 10 minit ketika jutawan kapal terbang Australia itu mengunjungi Perdana Menteri Datuk Seri Dr Mahathir Mohamad di pejabatnya di sini hari ini.

Dalam persidangan media kemudian Stoddart juga mengesahkan pemandu F1 pertama Malaysia Alex Yoong akan menyertai musim penuhnya dengan pasukan itu tahun depan.

Selain imej dan mesin baru yang akan diperkenalkan awal tahun depan, Stoddart juga berkata mereka akan membantu Malaysia mencari dan mencungkil bakat tempatan menjadi pemandu F1 yang berjaya pada masa akan datang.

"Kami akan bekerja dibawah program ini untuk empat tahun ini dan berkongsi peluang untuk membolehkan anak-anak muda melihat bakat mereka dalam perlumbaan F1. Mungkin mereka tidak berpeluang ketika ini, tetapi kita akan diadakan program untuk memastikan mereka mendapat peluang itu," kaanya.

Stoddart berkata sebuah sekolah memandu F1 untuk mereka yang berbakat akan ditubuhkan kerana Litar Antarabangsa di Sepang mempunyai kemudahan serta pakar-pakar yang dibawa masuk daripada Jepun dan Eropah.

Mengenai Alex Yoong yang menyertai tiga perlumbaan dengan Minardi musim lepas, Stoddart berkata pemandu Malaysia itu telah mengikuti program latihan dan akan lebih bersedia untuk musim baru nanti.

Sementara itu, Dr Mahathir, dalam satu kenyataan berkata: "Ini adalah peringkat berikutnya dalam strategi kita untuk memperkenalkan Malaysia kepada dunia dengan Kuala Lumpur sebagai laluan dengan menjadikan sukan bermotor ini sebagai kenderaan utamanya."

"Kita telah berjaya mencapai kejayaan dan menaikkan imej negara kita dalam bidang perlumbaan sejak 1995," kata beliau.

Hishammuddin pula berkata pertemuan singkat dengan Dr Mahathir hari ini bertujuan menjelaskan kedudukan terkini mengenai Minardi dan usahanya untuk membantu sukan bermotor dan teknologi enjin di Malaysia.

-- BERNAMA

DC AZZ ZB